

De Kwakel

CV de Moerebuuk
Jaorgank 49



Bouwhelm aaf, steek op,
wae zette mèt uch 't ganse
moeërelandj oppe kop

**Prins Luuk I
Prinses Robin**

Same mèt alle stripheldje
en heldinne, springe wae
de Vastelaovendj binne!



**Jeugdprins Sander
Jeugdprinses Dionne**



Vastelaovendj 2014

'Proklamatie'



Ich, prins Luuk de 1e, 63e prins van de Moerebuuk.

Groeët gewore net euver de brök in Kelpen, mer altied veul moeëreblood in mich gadj.

Zoon van aodprins Sé en aod prinses Elly van de Kujeldreiers.

Al bienao 4 jaor same mèt mien prinses Robin en same mèt heur zeen wae de jóngste bewoeëners van Niesgoet in de buurt Kunnekoel, vanaaf noe ómgeduipjt tot prinsebuurt.

Mèt de vastelaovendj biegestange door mien adjudante Rick, Tim, Noud en adjudant dame Fé.

Redelik sportief aangelagd, op dinsdig houw ich 'n belke bie T-Ell en op zunig speul ich in 't sterreteam van RKESV, ... 't derdje.

Daonaeve bèn ich ouch lid van Stichting Spook woeëmèt ich 4 kieër p'r jaor probeer minse behuuerlik sjrik aan te jage.

In 't weekend kin se mich dék vinje bie Siem, zoeëwaal veur as achter 't buffet.

Groeët fan van DE voetbalclub van Nederlandj, AJAX, woeë ich neet gaer 'ne wedstried van wil misse.

Trots lid van VV De Prutsers woeë ich officieel 't jóngste lid van bèn.

Al versjillendje jaor doon ich same mèt get vrinj mèt aan de Bóntje Aovendj.

Wirkendj inne bouw, woeë mien vak tummere op de proef weurtj gesteldj.

Vastelaoves veerder in hert en nere van jóngs aaf aan, want ich bèn ouch jeugdprins gewaestj.

Same mèt alle moeërebuuk wille wae d'r 'ne fantastische vastelaovendj van make.

Bie de gratie van groeët vorst Jan, vorst Henri en René, en de Raod van Elf verklaor ich 't volgendje:

Det ich same mèt mien prinses Robin en mien adjudante Rick, Tim, Noud en Fé d'r alles aan gaon doon óm deze vastelaovendj tot 'n geweldjig succes te make.

Det wae dit same doon mèt de ganse Raod van Elf, jeugdprins Sander en jeugdprinses Dionne, heur adjudante Bart en Demi en de ganse jeugdraod.

Det wae d'r same op oet trèkke ónger de klanke van prachtige live muziek van de Ellenthaler en de Kaolderbend.

Det de Prutsers zich weer hieël gaeve!! En den bedoel ich op alle vlakke, dus ouch 'ne wage bouwe óm mèt te doon ane Èller optocht.

Det pap, mam, Geer, Len, Thom en Ellen dees daag achter ós aan zulle gaon, same mèt de rest van de familie, gevolgdj door alle moeërebuuk en vastelaovesveerders.

Det ich dees daag zal ich regere in de Orde van de Bouwhelm
En dit alles ónger mien motto;

Bouwhelm aaf, steek op, wae zètte mèt uch 't ganse moeërelandj oppe kop!!!!

Leef moeërebuuk,

Dao begost 't den, de vriedig nao de kirmis. Wae, mien prinses en ich wore same aan 't oet aete wie ich 'n sms'je kreeg mèt dao-in de vraog of ich eventueel interesse haaj óm prins van Moerebuuk te waere. Ich waas op det moment nog hieëlemaol neet mèt vastelaovendj bezig, en miene hónger waas drek ouch euver. De ieëste minute nao 't sms'je ging d'r vanalles door miene kop haer! Ich waas blie, zenuwechtig en hieëlemaol versteldj det 't noe toch echt kost gaon gebeure. Dae hieële aovendj hóbbe wae 't d'r nog same euver gadj.

De volgendje daag kost ich 't neet geluive, Zooy ich den echt de noewe prins van Moerebuuk waere? Luuk van Kelpen? En jaowaal huer, 's aoves, net veur det ich nao Stichting Spook ging veur de lèste tocht van 't jaor, kwome ze mich vraoge. Wae keke dein en danger aan en zachte allebei geliek JAO!

De waeke daonao waas 't get röstiger en zeen wae ós adjudante gaon vraoge en kreeg alles bietje bie bietje vorm. Kleier waerdje gekocht, óngersjeijinge gemaaktj en tekste veurbereidj. Alles stiekem en dich neet verkalle mook 't extra spannendj en is op zich al 'ne geweldjige tied óm mèt te moge make.

Wae kinne neet wachte óm dit seizoen te beginne, samen mèt jeugdprins Sander jeugdprinses Dionne. Heur adjudante, Raod van Elf, jeugdraod, de kapel en neet te vergaete...GAE, de moeërebuuk!!!

Want zónger uch is vastelaovendj geine vastelaovendj!

Ich wins uch eine sjoëne vastelaovendj!!
Prins Luuk I



Six-pack banane

Jurre (7) en Benthe (5) wore same bie de Spar. Ze kwome mèt heur boeëdsjappe ane kassa, mer ze haje vergaete 't fruit aaf te waoge. Riny deej de wichter veur wie det aafwaoge ging en ze lagt oet det det môt, zoeëdet Riny ane kassa kôst zeen wiewöl d'rveur betaaldj môt waere. Jurre vónj dit mer vreemdj en vroeg: "Höbtj gae den neet dëkker klantje die 6 banane koupe?"



Ich wil ouch inne / eine kwakel

Ze hange in de kroege, de voetbalkantien en oppe sjoeël. Dit brieftje vónje wae inne kwakelbös bie Siem. Is 't jaortal verkieërdj? Deej ze 't in de verkieërdje bös? Of wist zie in juli al det hae prins zoj waere?



Gein greun vingers!

Zien broor adviseerdje hum óm 't gazon ins te spuite want dao sting waal erg völ drek in. "Kóm mer langs ich höb 't gister bie mich zelf ouch gespote en ich höb geine drek."



Hae waas eigelik neet zoeë veur det spuite, mer as eine deskundige dich det adviseertj, den meuk se van zón aanbod gebroek. Staags d'rnao waas 't waer good, hooldje hae de spuit van 't zolderke en ging Jos nao Lemmenhoof óm det spul te hole. "Steit inne iezere kast en dich wêstst woeë de sleutel liktj. 't Ónkroedmiddel steit op 't bovenste sjaap, links." Jos leustj de gebroeksaanwizing en zuut det t'r versjil is tösse pleksgewies en alles veur de voet spuite. "Woeë niks steit gaon ich neet spuite." De concentratie get sterker gemaaktj en ane gang. Hae waas euvral gewaestj mer haaj nog ein flinke klats euver. Dus nog mer 'ns nao gegange toet alles op waas. Nao drie daag kwome de ieëste reacties: " 't Graas kiekjt druueg", "Höb se gespote?", toetdet nao ein waek dudelik waas det alles kapot ging. Waat höbbe völ minse dao lol aan gatj. Jos haaj de verkieërdje pot gepaktj. Eine zwaordere broor van Round-up heet alles kepot gemaaktj waat t'r ouch mer ein bietje heet geraaktj. Zaat neet völ anges op den alles degelik vertikutere (blaore), opnoew inzeie en get cômpost d'reuver. Waat zeen d'r toch völ lestige vraoge gesteldj asof wiste ze neet waat t'r gebeurjd waas.

Natuurlik gespote wie 'ne gek, waat mein se anges." "Jao hae heet nog gelök gatj det t'r gein greun vinger heet, anges waas t'r die ouch nog kwiet gewaestj."

Roeëj plekke

In Swartbrook leep ein kudde sjäöp inne wei. 't Groeëtste deil d'rvan waas gedektj en haaj 'n roeëj plek bove de vot. Karin kreeg de sjäöp in 't vizier en zeet oetdagendj tege Peter: "Ich weit waat die gedaon höbbe." "Ich ouch," antwoordj Lynn (4) vanaaf de achterbank, "die zeen inne jam gaon zitte!"



Timmerbedrijf - Houthandel
W. STEUTEN BV

**voor al uw hardhouten
Kozijnen en Deuren**

Timmerbedrijf - Houthandel
W. Steuten BV
Grathemerweg 49B
6037 RN Kelpen-Oler

Tel: 0495-652178
Fax: 0495-651478
Mobiel: 06-53127981
www.steuten-timmerbedrijf.nl
steuten@bnet.nl

Open van maandag t/m vrijdag van 07.00 - 17.00 uur.
En op afspraak.



1. môt Jur
2. spoteecht
3. roeëj ballon
4. tekst Ell op 't bôrdje
5. pink Josje rechtse handj
6. 2e vinger losse erm linksveur
7. iezere staaf rechts bove
8. stikker oppe blouse van Jur
9. wiesvinger Silke
10. 2e vinger losse handj achter Silke
11. ermbendje Josje



Slagerij Ruud & Marleen Heijkers

Hèt adres voor
koude & warme buffetten en barbecue's compleet

Sebastiaanstraat 19 El tel. 0495-551242
www.slagerijheijkers.nl



Henderikx

Vastelaovendj Same!

**UW GROENE
vakwinkel**

Weverstraat 5A 6013 RA HUNSEL Tel.: 0495-786807
ALLES VOOR DHZ, TUIN & DIER

De Kwakel

Jaorgank 49

Zomercarnaval

Aafgeloupe jaor waas 't OLS in Rooj en 'n paar daag ieëre 't kinjer-OLS. De aodste groepe van de basissjoeël haje waeke geknutseldj aan heur pekskes en geofendj mèt loupe en trómme. Wie alles klaor waas lepe ze same mèt de sjötterrie eine op-tocht door 't dörp, om zich te presentere aan de minse van Èll. Ties (2) sting langs de kantj te kieke en meindje det 't vastelaovendj waas. Wie de stoet langs waas zeet t'r tege Maurice: "Zoeë pap, noe gaon we nao de Prairie!"



Maeterstandj doorgaewe

Ieërder kwaam eine nette mins mèt eine Volkswage Kever bie alle hoeze langs om inne maeterkast de stenh op te sjrieve vanne daag- en nachtstroom. Allewel is det neet mieër, wae doon zelf det via internet. Neet echt moeilik zoeëtse zegge. Mer toch leverdje det veur Geert (dae netste vanne tweeëling) nog probleme op. Waat waas ane handj? Geert móst van Chrissy efkes inne maeterkast kieke nao de maeterstenj en die den doorgaewe aan Essent. Den koste die de jaorraekening opmake. Geert sjrieff de stenh op, völtj de gegaeves in oppe site en klaor. Chrissy kan content zeen mèt zónne henjige kaerel in hoes.

Toetdet Essent leet wete det ze waal hieël erg weinig gaas verboektj haje. Wore ze missjien neet thoes gewaestj? Haje ze dèk örges anges gaete? Effeng, Essent vertroedje 't neet en zoeëj waal emes langs steure om te kieke. 's Waeks t'r nao stopdje d'r eine Volkswage, stapdje eine vent oet, dae beltj aan en vreugtj of t'r effe nao de maeterstenj maag kieke. Waat bliktj: heet Geert de standj vanne watermaeter doorgaewe in plaats van 't gaas. Jao, mèt zónne kaerel zal Chrissy zeker content zeen.



OLS VRIEWILLIGER

Jan haaj zich opgegaeve as vriewilliger veur 't OLS. Hae deej dit om de kas te spekke van 't zangkoeër mèt dae deure dirigent. Helpe op 't OLS beteikendj det ze nao de vriewilligers fieëstaovendj moogst. Jan haaj drie daag good zien bèst gedaon en haaj waal zin in 't fieëstje. Om neet te laat te kómme ging d'r mèt de electrische fiets. Óngerweges bedacht t'r zich det ze dae waal ins zoeëje kinne jatte. Hae fietstj heives, duit de accu d'rvan, (zóngere accu is dae fiets niks waard) en fietstj nao Rooj. Nao 'n paar pilskes bedinktj Jan zich det t'r zóngere accu gein leecht heet. Waat noe gedaon? Jan is soms 'ne verstenjige mins en dinktj, zóngere leecht fietse is gevaorlik en as ich ouch nog 'n proces krieg hób ich drie daag veur niks gewirtj en lache ze mich ouch nog oet. Jan kloekdje d'r zich nog gauw eine en waas veur 't dónkel thoes. En det is niks om mèt te lache.



Valle bak



Wie d'r opgebouwdj móst waere veur de survival van 't KVV, wore de kètingtakels nörges te bekinne. Tim snapdje d'r niks van "ich hób ze pas nog inne henj gadj!" Mer oppe zólder waas niks te vinje en ouch in de opslaag bie Vosse loge ze neet. Tim zocht al aaf, beldje get rónjdj en reej nog mer weer ins nao de zólder, want "dao mótte die dinger ligge." "Den kiek ich thoes nog waal ins, misjien hób ich ze oet de auto gegoeëtj." Mer de takels wore wèg en ze bleve wèg. "Den mótte wae mer kieke wie wae det gaon oplosse. Wae gaon noe opbouwe veurdet 't dalik dónkel is, den zeen wae niks mieër." In 't brook waerdje 't gerei oet de auto gepaktj en jaowaal, dao loge de takels! Hae reej d'r gewuuen al 'n paar daag mèt rónjdj!

Wisj dj'r al...

- det ózze bekker ins flink op stap waas gewaestj
- det hum det neet good bekwaam en det hae móst spieje
- det hae toen bekans alle deure van zien noew hoes geprobeerdj heet veurdet t'r de wc gevónje haaj.
- det bie Klaver ein slaopfieëstje waas en det de jónges de veurkorf stookdje
- det d'r op detzelfdje moment ein brandjmeldjing waas oppe Hoeëgstraot
- det de brandjwaer dao geine brandj kóst vinje
- det ze op volle sterkdje bie Klaver achteróm ginge, want dao waas rouk te zeen
- det de buurvrouw zagt: "dao rouktj 't waal dèkker!"



Roukverbod

Op det moment wore toevallig Esther en Rian aan 't werk inne Bachelorclub. Dao kwome twee vreemdje kaerels binne, die Hollandsj kaldje. Ze bestèldje ein pilske en vroege om eine asbak. "Nae," zeet Rian, "det maag noe neet, dao zeen controleurs rónjdj aan 't gaon!" Gelökkig wore 't gewuuen chauffeurs die bie lemme logeerdje.

Thijs Koolen
Beste Echte Bakker
van Nederland

Kunstsjaatse op graas!

Nao eine late en zate aovendj bie Steef en Carolien oppe housewarming wore Luuk en Bram oppe tied paraat óm te gaon voetballe mèt 't derdje. Dae aovendj daoveur waas aafgesproke det 't verstenjig waas as Bram zoj riej en Luuk en Tim zoje oppikke. Die dachte det se det waal koste gebroeke. Nao effe te hóbbe gewachtj en 20 kieër gebeldj te hóbbe beslote ze toch mer Tim oet bèd te gaon hole. Kloppendj oppe slaopkamerraam sjrók Tim wakker.



De Kwakel

Jaorgank 49

De manne stormdje nao binne en begoste Tim zien spulle in te pakke. Tim kost allein mer duf kiek en 'pffff jónges' rope. Óngertösse det Tim aan 't klettere waas paktje de vrinj zien tas. Snel inne auto en nao Tungelder. Dao aangekómme zeet Tim: 'Waat is die tas toch zwaor.' Veur de zekerheid haje die jóng zien sjaatse mer mètgenome. Sting d'r dao mèt zien sjaatse.




Lowieke zónger pieke

Lowieke vanne Vin haaj de beurs leeg en ouch May haaj niks mieër as get klotergeldj. Dus gaon ze allebei pinne. "Noe geit 't nog, straks mótte wae misjien nao Rooj." Ane pinautomaat ging ieëst det kaertje d'r neet in, mer wie hae de chip ane bovekantj heel ging 't vlot. Snel de code intoetse en... "foute code, probeer het nog een keer." "Det kumtj door mien dieke vingers." Ouch de twieëdje en de derdje kieër versjeen dees meldjing. "Laotj mich mer ins, ich heb dao mieër geveul veur" zeet May en floep dao zitj heure pinpas al inne sleuf. Ze toetsdje snel heur code in mer dao kwaam dezelfde tekst as bie Lowieke. Jao ouch de twieëdje en de derdje kieër. (Waat heet dae ezel daomèt te make?) De bank waas toe, dus ze wore allebei heure pas kwiet, mer erger nog: ze haje nog steeds gein geldj om cash te betale. "Mer mich kloeëte ze neet," zeet Lowie "ich hób thoes nog get in eine zok dae noeëts nemes vindtj." Nao de boterhamme mèt spek en ei vreugtj May: "Woeëróm hób se dae groeëte tegel boete losgegrave?" "Ich zagt niks, emes mótt die vrouwluuj neet slummer make den ze al zeen."

Aangenaam

Op zunig mèt de vastelaovendj kwome Ronald en Carien optraeje bie de Prairie. Wie ze binnekwome zoge ze adjudant Jochem dae mèt Marjet sting te kalle. Óm zich bekintj te make as de artieste zeet Ronald: "Ich bèn Ronald en dit is Carien." "Det treftj," antwoordj Jochem "ich bèn Jochem en dit is ós mam!"



Kaoje friet

De Mini F wore kampioen gewore mèt voetballe. Dave Gijsen, de trotse papa van ein van de kampioene, ging frietjes hole veur 't ganse team. 't Doordje en 't doordje en nao 40 minute sting Dave nog steeds te wachte op zijne friet. Hae informeerde al ins, mer Ben (de chef van Eltaria) verteldje det de friet nog neet klaor waas. Hae snapdje 't ouch neet. "Hób se de pan waal aangezatte?" vroeg Dave. Wie Ben det controleerdje, bleek det de vètbak inderdaad neet aansting, hae haaj allein de friet ingegoeëdj.

Dikke sji



Prins zeen is geweldig! Zoeëveul indrökke, alle aandacht en steeds in de spotlight! Mer 't is toch waal fijn óm dich effe aaf te zunjere oet die drökdje. Óngevieër zoeëget mótt Jesper gedacht hóbbe wie d'r bie Siem in 't keuke gedeildje de wc-deur op slot dreidje óm op zien gemaak te kinne poepe. Mer waat zoj d'r gedacht hóbbe wie d'r merkdje det t'r gein water waas óm door te speule?!



HAAR & NAGEL STYLING VOOR EEN BETAALBARE PRIJS.

Winnie Geelen,
Antoniussstraat 40, Eil

Tel: 06 - 10 97 88 91
hair_nails_4u@hotmail.com

'Optocht oetsleeg'

WAGES



VV de Vervaelers

1e pries mè 139,5 puntje

2e pries mè 134,5 puntje: "Wae kómme ut kieke" - Eine Chaos

3e pries mè 133,5 puntje: "Dames OLS" - De Pannestert

KLEIN GROEPE



Hub Willekens

1e pries mè 137,5 puntje

2e pries mè 135 puntje: "t zitj mich in 't blood" - Ron van richting Roy

3e pries mè 129,5 puntje: "Ich blief positief" - Paul Winkelmolen

Wisselbeker

VV EUNJ

1e pries mè 142,5 puntje

2e pries mè 136,5 puntje: "Dit jaor geit 't knalle" - VV Panaaf

3e pries mè 125,5 puntje: "Crisis bie de Hieëpe" - De Moeërehieëpe

GROEËTE GROEPE



Golden Girls

1e pries mè 132,5 puntje

2e pries mè 130 puntje: "Prinseblood" - Familie van de Prins

3e pries mè 129 puntje: "Mèt dees daag vaere" - Dames van FvdBB

EINZELGÄNGERS



'Koffie bie de vorst'

Beste Moerebuuk,

Veur mich, vorst Henri, zitj aod-prins Jesper I, de 62e prins vanne Moerebuuk. Aafgeloupe jaor in ózze Èller vastelaovendj veurop gegange en biegestange door zien prinses Maartje, same mèt heur adjudante Pieter, Tonny en Jochem en de adjudant dames, Sanne, Anouk en Laura.

Zoeë aan 't begin van ein noew vastelaovesseizoen wil ich toch nog van ózze kersverse aod-prins wete wie d'r 't belaeftj heet aafgeloupe jaor en stèl hum daoróm get moeilikke vraoge.

Jesper, waat heet dich 't meiste verrastj mèt die daag?

D'r zeen ein aantal dinge die mich hóbbe verrastj en woeë ich ouch erg blij mèt waas. Op de ièerste plaats de Raod van Elf en de dames van de Raod. Achter de sjerme gebeurtj d'r hieël veul en same mèt de Raod veultj det as ein groeëte familie, ich haaj noeëts verwachtj det dit zónne groeëte impact haaj.

Verder vinj ich de betrokkeheid van de jeugd in Èll benummeswaardig. Minse gaon neet mieër nao de stad, ze vinje 't hiej in Èll veul sjoëner. 't Toezinge mèt 't aaftraeje oppe dinsdig door ein gans café, det is kippevel, toen pas kwome de traone!

Besjrief 'ns waat se veuldjes mèt de optocht dao bove oppe prinsewage?

In ièerste instantie veural kaoj... mer ich kreeg 't vanzelf werm. Ein ónbesjriefelik geveul as se de locht in weurst gehese en den euver de ganse optocht oetkiekst. Den pas vóltj 't op wie drök 't is en des se neet ins zat tied hóbst óm mèt ederein effe contact te make. 't Unieke blijftj det allein de prins wètj wie 't veultj op dees huuegdje!

Dink se achteraf oeëts; "Det haaj ich nog wille zègge of mètmake?"

Ich vónj 't jaomer det wae neet nao Kelpé-Oler zeen kinne gaon. Ich bèn dao altied gaer oppe receptie gekómme mèt de kepel en dit haaj ich zeker as prins mèt wille make.

Wèt se nog mèt weem se mèt die daag 'n serieus gesprek hóbst gatj en woeë ging det euver?

Mèt die daag hób ich ein aantal serieuze gesprekke geveurdj, veural mèt aod-prins en waarsjienlijk ouch mèt ein paar minse die inne toekomst nog prins gaon/wille waere. Die gesprekke ginge bienao allemaol euver wie ich mich veuldje en of 't tot den toe nog allemaol beveel. Aan aod-prins kin se tips vraoge veur bieuevbieëldj ein receptie of iets dergelijks. D'r zeen ein aantal potentiële prinsse veur in de toekomst, die pik se d'r zoeë tösse-oet. Det zeen minse die stèlle allerlei vraoge en zeen de ganse vastelaovendj erg betrokke! Ich num gein name...

Dao mótt eine persoeën of groep zeen dae dich echt opgevalle is op welke maneer den ouch?

De steun die ich hób gekrege van de Koalderbend is neet te besjrieve. Det d'r zoeëveul wirk weurdj gedaon óm 't dich nao diene zin te make, óngelufelik! Altied en euveral mèt ein groeët muziekkorps nao binne en den de ganse tent platblaoze, det is sjiek en belangriek veur eine prins.

**As se 't nog 'ns euver kost doon, deet se 't den en wie?**

Teurlik doon ich det, gein discussie euver meugelik! Ich weit nog neet of ich 't anges zoeëj doon want 't is mich op dees maneer namelijk erg good bevalle.

Waes achteraf bekeke de keus vanne adjudante good, of haat se baeter angere kinne vraoge?

Die keus waas de bèste die ich oeëts haaj kinne make. Boete det ich mèt Pieter al ein langloupendje aafpraak haaj, waas de keuze veur Jochem en Tonny veur mich ein logische keuze. Alledrie vastelaovesveurders in hert en nere, det straoltj d'r vanaaf. Automatisch gaon den alle naze in dezelfde richting, det meuktj eine groep com-pleët!

Zeen d'r momente gewaestj die se lever neet of op ein anger maneer haats wille belaeve, tegevallers of zoeëget?

Ich haaj lever gadj det Opa, inmiddels euverleje, 't allemaol bewustj haaj mèt kinne make. De lèste tied ging 't allemaol hieël snel mèt opa, hae heet jaomer genógt mer ein paar glimpe van mich as prins op kinne vange.

Waat zoot se de noewe prins as advies wille mètgaeve?

Laot alles euver dich haer kómme, geine stress. Ze hóbbe veur dich gekoze ómdes se d'r gesjikt veur bèst. 't Innige waat des se hoofs te doon, is vanoet dien hert spraeke, spontaan, mekkelikker kan neet. Maak d'r eine geweldige vastelaovendj van, mien steun hób se! As des se vraoge hóbst kin se mich altied aanspraeke.

Jep, ich wil dich en de hieële groep gaer bedanke veur 'n fantas-tisch vastelaovesseizoen. Wae hóbbe van uch as groep en veural dich as prins erg genote. Dit geit mèt ein gouwe rendje de beuk in as 't jaor van prins Jesper I en prinses Maartje.

Vorst Henri, dich ouch bedanktj veur de lekkere waofels... trouwens, wil se 't fotobook al zeen?



De Kwakel

Jaorgank 49

CV de Moerebuuk

Oet de aoj doeës

ELLEBOGE ATLETIEK

VREUGER IN ÈLL WOEËNDJE EINE PESTOEËR MÈT ZIEN MAAGD DIE EIN GROEËTE HAAJBAAI WAAS OP 'T GEBIED VAN VEURKROEPE. KEETJE MEINDJE DET ZE EUVERAL VEURRANG HAAJ, ZE WAAS EIN ZIEËR VEUROETSTREVDNDE DAME. ZOEË KWAAM ZE OUCH 'T POSTKAN-TOEËR BINNE WOEË 'T EIGELIK NEET ZOEË DRÖK WAAS MER ZE KROOP TOCH VEUR. AAN 'T LOKET VROOG ZE: "ICH HÖB EINE BREEF VEUR NIEUW-ZEELAND, WIEVEUL PORTO MÔT DAO OP?" DE BEDEEND-JE ZEET TOEN: "AL MÔT DAE BREEF NAO DE HEMEL, GAE MÔTJ UCH BEURT AAFWACHTEN."

NEET BELANGRIEK MER INTERESSANT.

IN EIN DÖRP, NEET WIET VANNE GRENS, (WELKE GRENS VERRAOJE WAE NEET) WOEËNDJE BOOR SJAOKES, DAE DE GEWUENDJE HAAJ ÔM DE KUJ HIEËL LAAT TE MÈLKE. SÔMS WAAL INS ÔM 9 OOR PAS. IN 'T DÖRP WISTE ZE DET EN ZE KALDJE D'R WAAL 'NS EUVER. 'NE BOOR HEET EIN VRIE BEROEP EN KAN DOON EN LAOTE WAAT HAE WILTJ. OP 'NE DAAG GING DE BOOR WEER LAAT NAO DE WEI. DE IEËSTE DE BÈSTE KOE WOEË HAE BIE KWAAM HAAJ EIN BÖRDJE TÔSSE DE HEUR HANGE: "ICH WIL IEËRE GEMOLKE WAERE." ALLE ANGER KUJ HAJE EIN BÖRDJE MÈT "ICH OUCH." IN 'T DÖRP HAJE ZE NOG LANG PLEZEER VAN DIE STREEK VAN DAE VANNE HOOF, MER OP VANDAAG ZOEËTSE OP DE SITE VAN "GEEN STIJL" KÔMME.

MAAS- en ROERBODE 1961

LÊTTERLIK OET DE AOJ DOEËS.

Toen de redactie bezig waas mèt deze Kwakel en op zeuk waas nao "aod noets" kwome wae bie Mia van Lemme (det waas oeëts van Èll mer veultj zich al jaore hieëlemaol thoes in Haler) ein aoj doeës tege mèt de bookhaojing van jaore en jaore trök. Wae zoge raekeninge van Smeeds Teun, van Jan vanne Sjrueer, van de Borebóndj, vanne werktuigevereininging, van Jan van Stien, en nog völ mieër anger Èller middestenjers oet de jaore zestig en zeventig. Dao waas zelfs ein raekening bie van Harie vanne Mölder toen dae nog de naam haaj van Wind- en watermolen Granen en Meel. Det waas nog veurdet zien meule oppe Swartbrookstraot inne fik ging (indj 2e Wereldj Oorlog).

Dju, waat woe d'r toen den veul óngernummers en wae höbbe d'r echt ein hieël deil nog neet gatj. Natuurlik zeen wae blie mèt ózze bête bekker, mèt ózze slegter Ruud en Marleen, mèt de Spar en mèt de aettente en kroege. Mer waat zulle ze vreuger gruuets (nae, die zaak liktj in Wieërt) gewaestj zeen op al die bedrievigheid zoeë kort inne buurt. Echt oet de aoj doeës. Die gaon wae oetpluze.

A. H. v.d. VEN & ZONEN
MAATKLEDING EN CONFECTIE
Niesstraat 4 ELL Telefoon 228

NOTA voor *L. L. T. B.*

1. Vervall. 50	22.90
1. " 50	22.90
1. Breek	15.45
	612.5

1572 1981 Verk. nr. 11

Veur hōnder en verksvoor,
veur kuuj en kaoverbrōkskes,
veur kali en anger kunstmet:
ELL.
L.L.T.B.

WERKTUIGENVEREENIGING
"SAMENWERKING" G.A. ELL

REKENING voor Dhr. *Opheer Dijkhuis*

Werktuig	L.	Bedrag
Wegvoeren	1.00	1.00
Dieren-Panen	1.00	1.00
Ploegen	H.A.	1.00
Oogstmaaien	H.A.	1.00
Fuizen	H.A.	1.00
Maaisnijder	(verpand)	1.00
Schroeven	1.00	1.00
Panen	1.00	1.00
Groenmaai	H.A.	1.00
Watermolen	H.A.	1.00
Pluizen zaai mach.	H.A.	1.00
Kuuj-ropen	1.00	1.00
Carapagen	H.A.	1.00
Stangreider	1.00	1.00
Coukjes	1.00	1.00
Groepstuit	H.A.	1.00

Totaal 14.00
voor bank 14.00

Wè levere 't bête mingvoor,
veur hoonder, verkes of kuuj.
Auch veur kore, haver, gerst en terf
gève wè de hoeëgste pries.

H. KOOLEN - mulder

Goadj noa Bér en Marie
Hubtj der 't drök, kintj der 't
werk neet mieër allein aaf,
goatj effe noa Pietje, Tjeu,
Bér of Sjaac.
Die zeen den altied met heure
tractor of dèt anger dink
paraat.
Werktuigen ELL

Effe buurte mèt:

De Kwakel

Jaorgank 49

Sjaek van Linje (Jac Triepels)

't Waas destieds aan pestoeër Adams te danke det in Èll 'n vastelaovesvereniging is gekómme. Dae mins haaj toen al inne gate det t'r get móst gebeure óm de minse mèt de vastelaovendj in ós dörp te haoje. Hae kreeg ein paar verstenjige luuj zoeëwiet óm get dinger te organisere zoeëdet die drie daag, in alle gezelligheid van toen, in eige dörp doorgebracht koste waere. Sjaek waas ein van die men "van 't ieëste oor."

'ne Man dae nog steeds gruuets is op zien handsjrift, veul mètgewirktj heet aan publicaties zoeë-as "ERI" (Eil Roept Indië) en 't boek "RKESV en Eil in de schijnwerper". Hae is al 70 jaor lid vanne voetbalclub en bienao aeve lang vanne fanfaar. Sjaek is geine stilzitter, wirktj momenteel aan de Triepels-familiestamboum en lostj tössedoor gaer nog 'ne puzzel op.



Redactie:

Wie waas 't om kertrekker vanne Moerebuuk te zeen in dae tied?

Sjaek:

Eigelik waas t'r nog neet echt sprake van 'n vereniging. Tege de tied det vastelaovendj d'r weer aan zaat te kómme vergaderdje wae 'n paar kieër in 't "kaemerke" in café Palmen. Ich höb toen 't ieëste secretariaat op mich genome en ouch verslage gesjreve die jaomer genógt verlore zeen gegange. Dao waas noeëts gein geldj dus op 'n gegaeve moment, toen d'r mantjels veur de Raod van Elf móste kómme, waerdje 't bestuur vanne fanfaar bereidj gevónje óm 70 göldje te gaeve veur de aansjaf daovan.

Redactie:

Ils der eine haup verangerdj in de laup vanne tied?

Sjaek:

De vastelaovendj doordje vreuger mer drie daag. Dao waerdje altied veul gedanstj en dao móst dus veur orkeste gezörgdj waere. Mer jeh, meital wore de orkeste inne ómtrèk nateurlik al volgebooktj en móste wae wiejer wég op zeuk. 't Is oeëts veurgekómme det t'r beroepsmuziekante oet Rotterdam nao Èll kwome. Die keke zich nateurlik de ouge oet wie ze toen zoge wie det hie d'r aan toe ging.

Redactie:

Wie zeetj gea prins gewore?

Sjaek:

Ich waas al 'n paar kieër gevraagd, mer vreuger waas vrie kriege bie de baas nogal lestig, dao woor se veurzichtig mèt. Mer in 1957 bèn ich tot prins gekoze door de Raod van Elf middels stumbreefkes. Op zunjigaovendj waerde ich in 'n Van Gend & Loos-kist 't podium opgedrage en efkes later ónthuldj. Dao waas gein officieel receptie óm te felicitere, det gebeurdje zoeë tössedoor. Waal woor se nateurlik 't middelpuntj vanne belangstelling. 't Waas zeker 'n ieër óm as prins veur te gaon in 't fieëst en ouch waerdje d'r 'n officieel weurdje gesproke. Daezelfdje aovendj kreeg ich 'n maedje inne smieze en zagt tege 'ne angere: "Mèt det maedje gaon ich vanaovendj heives." Det meadje waas nateurlik Martha, op 13 januari 2014 al 55 jaor zien prinses! Veur de lol en de ieër zoeëj ich tegewoordig nog waal 'ns prins wille zeen. Van de angere kantj twiefel ich ómdet d'r toch veul bie kumtj kieke mèt det drökke programma.

Redactie:

Waat vónje de deilnummers en toesjouwers vanne optocht vreuger?

Sjaek:

De optocht stèldje neet zoeëveul veur, allein get wages die snel inein geknutseldj wore en haost gein einzelgängers of groepe. De route ging in 't begin inderdaad wiet boete 't dörp óm en dao sting haost gein volk óm te kieke. Binne de bebouwdje kóm waas 't waal sjoëen en veuldjes se mieër de ieër óm oppe prinsewage te staon.

Redactie:

Höbtj gae oeëts ane Kwakel mètgewirktj?

Sjaek:

Nae, aan de Kwakel höb ich noeëts mètgewirktj. Waal höb ich, al veur det de Kwakel d'r waas, same mèt Theu Cremers twee jaor achterein 'n krentje gemaaktj. Det waas 'n veur- en achterpagina op gezetteformaat, volgesjreve mèt zeiver nateurlik. Van die krentjes (1956 en 1957?) is waarsjienlik niks bewaardj gebleve. Jaomer!

Programma:

Om neet in de wêr te kómme met 't ein en anger gaive wè noeë efkes 't programma:

Zûnjig	24	febr.	}	Danxsen in e l l o n a z a a l
Moandjig	25	"		
Dinsdig	26	"		

beginne óm 5.30 ure. !!!!!!!!!!!

De Kwakel

Jaorgank 49



BEROEMDJ

Meister Koen geuft in Hunsel les aan groep 3 en 4. Aafgeloupe jaor rónjd de vastelaovendj ging de les euver beroemdje zeen en beroemdje minse. Aan 't inj vanne les vroeg Koen ane kinjer of t'r emes waas dae eine beroemdje mins kost. Wesley stiktj driftig ziene vinger op en zeet: "Ich meister: Huub Verhaag!"

Wirksjoon

Joost meindje mèt Cas waal effe noew wirksjoon te gaon passe. Wie ze bie de borebóndj wore en de sjoon aan haje veuldje Joost ins woeë det zien tieën zote. Mer det ging neet want die sjoon haje staole tuppe. Alle begin is moeilik!

Winkelmolen v.o.f.

MEUBEL- & TIMMERWERKEN

Hoogstraat 30e
6011 RZ 44
Telefoon: 0495 551619
Mobiel: 06 23 635 405
E-mail: winkelmolen@planet.nl

Die zitj!

Wouter waas bie buurvrouw Christa binnegeloupe en Christa kwaam net oet de douche. Wouter kiekj en zeet: "Waat zeen ich toch?" "Jêh," zeet Christa, "ich kóm net oet de douche en hób mich nog neet opgemaaktj." "Jao," zeet Wouter, "Barbie is ouch altied zoeë lieëlik as ze neet is opgemaaktj."

Doan eur veut pien inne schoan, dan kint ge bie Bep de veut loate doan!

Medisch Pedicure Bep van Oosterhout



Scheijmansplein 5, Ell / St. Willibrordusstraat 10, Nederweert
Bel vur un aafspreek noa; 0495 55 23 64 of 06 5435 8227

Dudelik op Marktplaats

De sjilder oet Swartbrook (laot hum ós rome Piet numme) waas d'r mèt gestoptj en kost niks mieër doen mèt zien bus. Ziene zwaoger, henjig op Marktplaats, zeet: "zètse op Marktplaats, den bèsse die bus zoeë kwiet. Ich help dich waal." 's Aoves ging de telefoon en aan de angere kantj waere specificaties van de bus gevraagd en gecontroleerdj. "Goed, dan ben ik morgen om 11.00 uur op het station in Weert. Kunt u me daar dan ophalen?" Nateurlik waerdje dae kuiper (eine broene mins, mèt zwarte-piete-accent, 2 m lank, zwaor gebouwdj en breid van sjouwers) opgehoojd om de bus te bewonjere en te koupe. Mer dae mins waas neet bliej, die bus voldeed echt neet aan de besjrieving. Dao waas get anges beloofd en besjreve op Marktplaats dan d'r in werkelijkheid sting. "Ik koop hem niet, breng mij maar terug naar Weert." Ane statie zeet dae mins det t'r geldj wiltj (€ 35,00) veur de trein, hae heet ein kaertje gekocht ómdet t'r ein bus woeëj koupe en det is wèggegoeëdj geldj want 't waas ein hieël anger bus. Piet kiekj hum aan, zuut zien dikke erm en geuftj hum € 10,00. Det vinj ich good betaaldj. "Jij wel maar ik niet", zeet dae mins en hae bleef zitte. Wie Piet ouch kaldje, dae mins speuldje get mèt zien bisceps en bleef zitte wie ein hout. Oppe door heet Piet hum nog ein briefke van € 20,00 gegaeve. Dae mins bedankdje hum en vertrocht. Oppe repetitie vanne fanfaar wist ederein 't baeter. Zoeë zoj Thè van Sjaokes hum onger zien lómmele hóbbe gestamptj. Har Gieëne haaj hum inne auto laote wachte toedet t'r ein óns woog (eine Zwarte Piet van 125 kilo!) Ley van Breukers Crist zoeëj de sjilder oet Swartbrook gebeldj hóbbe, "want dae woeëj zien bus kwiet". Mies van Evers zeet: "Det verhaol det kin ich, dae mins woeëntj op Fatima. Dae duit det dèkker zoeë, meital 2 kieër per daag. 's Middigs lieëtj d'r zich den door emes van Rooj of Beul ophole". Gae haatj dae Piet mótte zeen kieke, hae kookdje bienao van gift, zoeë kwaod op Marktplaats.nl.

Zwarte mertj

Sammy, det is dae verkuiper dae de kroege aaf geit, heet eine laere hood te koup. Erik heet dao zin in mer vindjt €14,- (excl. BTW) tevöl. De Witte begintj te hanjele en zeet oké bie €7,50 en dinktj, ein kuipke veur de vastelaovendj. Eine tied later löptj Erik bie Paquay binne en zuut dao dezelfde



(slag)Roomse reis

Boete waas 't 35 grade en de meide zote bie Roger in 't zwumbad. Corine woeëntj nog gein 200 maeter verderop en die haaj eine sjoeëne taart gemaaktj en dacht det is waal leuk veur bie 't zwumbad. Mer jeh, dae taart waas van chokelaat dus loupe waas gein optie, want dae zoj innegang wègsmèltje. En mèt de auto riejede det ging ouch neet, want dae waas vól te werm van binne. Waat deej Corine: die zat de airco aan en leet dae 'n half oor bolle. Toen waas de auto genógt aafgekeuldj óm de taart 'n paar maeter wiejer te bezörge.

CUE

SUPPORT

Als gae ein gooj, en professionele, audiovisuele oplossing zeuktj, help ich uch gaer

Roger Creemers | 0495 - 586260 | 06 28230498

'Kale erm'

Wim Tunissen móst veur 'n ingreep nao 't zekehoes. De dokter vetèldje hum waat hae ging doon. Zoeë zoj d'r mèt ein drain get gebeure en get mèt 'n infuus. Noe is Wim nogal behaordj en bie de gedachte aan pleisters zaag hae de bui al hange. Daoróm sjoor hae bie veurbaat al de haor van ziene erm aaf. Gelökkig veur Wim waerdje de drain via de lies ingebrachtj. Waat zal d'r geakaatj höbbe wie dae pleister dao los móst!

Wisj dj'r al...

- det ein hieëp slum genógt waas óm zich eine henjige parkeerpas aan te sjaffe in Wieërt?
- det se zoeë ónhenjig waas det ze de bankpas gebroekdje óm aaf te raekene?
- det de parkeermaeter dao geine raad mèt wist?



"Meneer Corsten
wilt u een advocaat?"

Boeje!

Siem (58) zaat inne café en vertèldje waat hae toch weer haaj mètgemaaktj: Ich sting in Indjhoove oppe statie oppe trein te wachte, kumtj dao zónne dikke BOA dae zeet:

"Meneer u mag hier niet roken, daarvoor krijgt u een boete." Ich zèk: "Och dich, ónnuezele mèt dien vètte pens, det zuls dich mich vertèlle." Kreeg ich alweer zón gael papeerke hè, belediging. Toen vroeg dae: "Heeft u legitimatie bij zich?" Ich zèk: "Jao det höb ich, mer det krieg se neet." Toen klik, klik haaj ich de ermbendjes al óm en móst ich mèt nao 't bureau! Dus ich dao effe gezaete, kwaam dao zoeë 'ne wout dae vreugtj: "Meneer Corsten wilt u een advocaat?" "Ich dink det dit deur zat is, dink se neet?" Effe later lete ze mich gaon en jeh, nateurlik reej d'r geine trein mieër. Dus toen bèn ich nao die kroeg gegange dao bie de statie, dae dao in zijt dae kin ich van de blues-festivals. Dus ich kóm dao binne en zèk: "Doot d'r hie eine veur de hieël café, ich bèn net vrie!"



HC Webservices
uw online servicepartner!



ondersteunt en ontzorgt
bij het online ondernemen

www.hcwebservices.nl



Veur Frans spraek
mèt lef:

Jan van
Meister Zef

Custers Taaladviezen

Veur eine appel en ein paer
gaotj gae nao
fruitbedrijf Moors
haer.



PIEPKE VERBERGE IN KELPE

Tiejies de KVV-waek haaj de leiding van groep 7-8 'n smokkeltocht georganiseerdj in kujeldreierslandj. Veur as se 't concept neet kinst: bie dees activiteit is 't de bedoeling óm smokkelwaar te verveure, zónger det de douane dich te pakke kriegtj. De douane waas erg fanatiek óm de groepe te betrappe, mer de smokkelieërs wiste zich good te versjoel inne struuk of 'ne graaf. Zoeë

verstopdje eine groep zich achter ein boorderie. Ze probeerdje achter de sjeur óm weer trök oppe smokkelroute te kómme, mer dao koste ze neet door. Ze móste zich dus op 't landj sjuul haoje, totdet de douane verder reej. Ómdet 't al laat waerdje ginge Richard en Tim de route langs óm ederein nao binne te hole. Opins sjeen emes ein lamp op heur gezicht en reep: "Stop, handen omhoog!" "Haha lache jónges" zeet Tim nog, mer de stum herhooldje de opdracht en kwaam dónderbie met de lamp. Toen waerdje de streepe oppe jas zichtbaar en bleek det ze te make haje met eine plies. Minse inne buurt haje gemeldj det t'r inbraekers gaondje wore. 't Kosdje heur get meute, mer ze kregde dae plies oetgelagtj det ze zwarte kleier aanhaje en zónger leecht fietsdje ómdet ze mèt ein smokkeltocht bezig wore.

Óngertusse besloot de groep achter de sjeur det de kust veilig waas. Weer trök oppe weeg, kwome ze Richard en Tim tege. Die vertèldje det de douane al ruum 'n oor geleje gestoptj waas met zeuke. De groep snaptje d'r niks van, ze haje net de douane nog zeen sjene! Wie ze huurdje det die leechte neet vanne douane wore, vonje de wichter det waal sjiek. Ze wore zelfs door de echte pliesie neet gepaktj!

Is 2 kieër de helft ouch good?

Aan 't hoes det Carolien en Steef kochte móst 't ein en anger gebeure ieër ze d'r in koste trèkke. D'r waerdje hel gewirtj, mer Steef leep mèt zien twieë linkse henj danig ónger de veut. Daoróm steurdje sjoënvader hum d'r steeds op oet veur ein boeëdsjap. Zoeë kwaam 't det hae in zien Corsaatje op Leivere aan reej óm eine latei (det is eine betónne balk dae de moor dreugt bove eine kozien) te hole veur bove de raam. Bie Heijne brook hum 't zweet oet, zoeë 'ne stein van 2 maeter dae krieg ich gaaroet neet in miene auto! Gelökkig is Steef neet veur ein gaat te vange, dae kocht d'r zich twieë van eine maeter!



Zeuk de 11 versjille



Good ontbijt

Scissors & Co
Since 2002

HAARMODE VOOR HEM EN HAAR

0495 55 19 95

www.scissorsenco.nl

Technisch inzicht

De artieste vanne seniorenmiddig waere al jaore biegestange door ein technisch team. Dees jónges verzörge handj en span deenste oppe Bühne, zoeëdet de artieste zich volledig op heur stök kinne concentrere. Wie de Bühne klaorgezatte waerdje veur 't volgendje stök bleef de gerdien erg lang toe. De minse inne zaal zoge allein det de kapel bove 't podium krómp laag van 't lache óm get waat zich achter de gerdien aafspeuldje. Opins ging Mart ziene telefoon. 't Waas Bart van Hover dae beldje: "Mart, dich steis óngertösse al 5 minute mèt dae pupiter te póngele! Gaef mer efkes aan Roy, dae heet det dink zoeë veur dich oetgeklaptj!"

Wisj dj'r al...

- det de ieëste pries mèt de kleurwèdstried oppe kirmis, 15x sjete waas inne sjeettent
- det dae pries gewónne waerdje door Kay (4)
- det papa Stefan dae pries toen heet verzilverdj
- det dae zoeë good kan sjete det hae ein sjaemel baerke van 8 cm gewónne heet
- det Siem waal dèkker zitj te steggele aan 't buffet mèt Marlies
- det Marlies op 'n gegaeve moment aan 't niese waas det ze zoeëvöl belasting mót betale
- det Siem toen zag: "Nae, dao haoj ich mich neet mèt op."

De dokter sjreef José ein antibioticakuur veur. De biesloeter waas dudelijk: 3 maal daags innumme en veural neet op neuchtere maag. Op zunjigmörge óm 6 oor ging de wèkker in hoeze Klaver. Wim meindje det hae zich verslaope haaj en zaat drek rechtop in béd. Wie hae bedacht det 't zunjig waas vroeg t'r woeërom de wekker ging. "Ich mót mich get gaon aete, euver ein oor mót ich mien tablet innumme!"

GREUN VINGERS

Siem ging nao Verhaag óm potgróndj te kaupe. zeet Huub: "Potgróndj kan ich dich verkaupe, mer die plentjes die se zeuks, die hób ich neet!"



SPAR



MIJN BUURT MIJN SPAR

SPAR DERKSEN
SEBASTIAANSTRAAT 12
6011 RE ELL 0495-551285





Herstèl

Bie det woord kin se dich vanalles veurstèlle. In deze tied zulle de meiste minse waarsjienlik drek dinke ane economie, die zoj zich aan 't herstèlle zeen. Mer as se kiekst waat alles kostj, waat se verdeent en den aan 't inj vanne maondj euver hèlst, den blijft 't nog effe aanpote.

Aan 't woord herstèl kinne veul beteikenisse opgehangen waere. As Loes vanne Kaolder veur de sjötterrie de tenues naokiektj of aaf en toe get vermaaktj, ómdet ze weer 'n noew lid binnegehooldj hóbbe, den is det ouch herstèl. Of num noe eine klantj van Joost dae strómpelendj dao de zaak binnestaptj mèt zien krukke. As zónne klantj nao get knaejwerk en oefeninge weer heives geit en daobie zien krukke vergitj, den kal se pas euver herstèl. De Hunnissestraot is pas geleje tot veurbie Geutjes breier gemaaktj en verder opgeknaptj. Det is ouch 'n geval van herstèl det zelfs lieët zeen wie good ós belastingcente gebroektj waere. Al is 't mer det vieëwages en landbouwmachines noe nog baeter door kinne óm alles weer aan gort te rieje. 't Is den in eder geval snel te herstèlle.

Mer herstèl kan ouch oetblieve. Ós ieëste kan d'reuver mètkalle. Veurig seizoen waas 't halleluja toet óngevieër de winterstop. Pas nao lang mertele kwome d'r och herm 5 waeke veur herstèl in dezelfde klasse. Volges Van Dale is 'n beteikenis van herstèl "trök bringe in vreugere toestandj". Det löktj bie sómmige noeëts, emes kan get neet trök bringe nao ein situatie die d'r noeëts is gewaestj. Lómp gebore en niks biejelieërdj, is neet te herstèlle. Nae minse, herstèl zitj deper, det zitj tösse de oeëre zeet ouch Wikipedia. Óm baeter te waere mós se dus dien bèst doen en soms aan dinger zoeë snel meugelik 'n inj breie. D'r oetgaon mèt de vastelaovendj is dao 'n good moment veur. Fijn daag gewinstj alvast, en 'n good herstèl d'nao...

Pam

Lampe doon 't

Oppe brök richting Kelpen zeen aan beids kantje straotlampe gekómme. Ein hieël verbaetering en 'n stök veiliger. Zeker waar. Óm det te kinne betale mót d'r in Èll waal bezuinigd waere op straotlampe. Wae stèlle veur det everal woeë nog eine bôltj is de lampe oetgaon, want 'dao rieje de minse toch langzaam', in 't boete gebied de lampe oet (dao gebeure soms toch dinge die 't leecht neet kinne verdrage) en op Steenebampst allein straotlampe woeë de kómendje 15 jaor ein hoes weurtj gebouwdj. En as die van Kelpen van det leecht oppe brök ouch profiteere (as ze get te laat heives gaon) den mót bie José van Miet oppe Grathemerweeg ouch de straotlamp oet. De profiteurs betale mèt!



Ellske

Kritisch, sjeep en oplèttendj. Det is Ellske. Dees aof tante duit op heur eige meneer

verslaag van
waat ze
zoeë-al hie
inne buurt
heet gezeen
of gehuurdj.



't Is ouch noeëts good

Veurig jaor knoterdje de minse det Èll ane lèste mem hing bie de gemeindje. Die bôltje det waas niks, bie Kempkes kruus ein laevesgevaorlikke situatie "en die vanne gemeindje röstig doorslaope!" Noe haje die van Leudal de dobber ónger, dao kwaam ein anger coalitie en drek verdween dae bôltj oppe Hoeëgstraot en kwome d'r oplossinge veur de fietsers nao Halen en Rooj. "Dao zeen wae baeter van gewore," zagt Ron van Richting Roy "die vrachtauto's die huuere wae nog mer hieël efkes, den zeen ze al bie Sjra van Stiene. Veul minse hóbbe mieër tied óm nao 't kruusbieëld te kieke en den ein schietgebedje te doen veur gein botsing. Dao haje ze ieëre geine tied veur.

Smeets Steyvers

schildersbedrijf

Sjaak Smeets

Brederkamp 13

6011 SR Eil

☎ 06 1221 5102

Erwin Steyvers

Graswinkellaan 151

6005 KE Weert

☎ 06 1138 0755

E-mail: info@devakschilders.nl

www.schildersbedrijfsmeetssteyvers.nl



Baeter ein hieëp inne handj...

't Waas kirmis en bie de Prairie waas aardig get volk oppe bein. Zoeë waas ouch ein deil vanne hieëpe vanne partie. Ze haje zich rónjdj 'n taofel verzameldj en amuseerdje zich köstelik mèt zelfverzónne rondedansjes. De aanhang bleef op gepasdje afstandj en lete die vrolje gewaere.

Op 'n gegaeve moment trocht Johan de stoute sjoon aan, staptj oppe taofel aaf, paktj zien vrouw ins lekker vast

en floestertj leef weurdjes in 'Sandra' heur oeër. Mer of Johan ziene bril neet zuver haaj? Kan hae 't Limburgse beer neet verdrage? Waas 't te dónkel oppe dansvloer, of zaag hae zien kans sjoeën? Wae höbbe neet kinne achterhole waat Johan bezielde, mer gelökkig waas Wies waal in veur ein ómhelsing mèt 'dae liefallige echtgenoot'!

- A. Ich höb 't heit, Paul knip mich van dae panty effe eine kniekous
- B. Nog ein pötje strip-pokere, of sjeie wae oet?
- C. Marlies kintj gein afstandj doon van heur favoriete kruk
- D. Det is te hoeëg, Paul pak mich de leier ins, zitj in miene panty



TIM & TONNY AUDIO • LICHT • EN KARAOKEVERHUUR | ELL

Tietjes

Nel van Bér kwaam bie de Prairie binne veur de kaartverkoop van de bóntje aovendj. Ze haaj heur ochtend/aovendj-tenue (hoespak) nog aan en zeet: "Kiek wie ich d'r bie loup." José (Beurskens) vreugtj toen: "Höb se waal eine BH aan?" "Nae," zeet Nel, "Bér zeet altied det die tietjes van mich nog oetseen wie bie ein meid van 17." "Ja," zeet Evert toen, "17 lentes met 'n paar strenge winters."

Wisj dj'r al...

- det Maartje nao de sleuteleuverdracht 's nachts óm 'n oor of 3 wakker waerdje van stroumendj water
- det 't leecht oppe badkamer aan waas en det Jesper zich prinsheerlik sting te douche
- det Maartje vroeg woeërom hae in godsnaam op det tiedstip ging douche
- det Jesper antjwoordje: "Dich zagst det ich móst opstaon!"

- det Mariëlle 't vrieët werm vónj oppe prinsereceptie
- det ze meindje det ze last haaj van opvlegers
- det ze d'r thoes achter kwaam det 't zón vaart neet leep
- det ze eine thermo-legging aanhaaj in plaats van heure glanspanty!

- det t'r inne Pannestert minse woeëne die creatief zeen mèt inlègkruuskes
- det sómmige die inne sjoon duje
- det José gein kaoj veut heet gadj tiejes de optocht.

Spaghetti veur 'n gans weeshoes

Ze wore pas gaon samewoeëne, ze haje 't hoes ieëst flink opgeknaptj en toen gezellig ingerichtj. Jao ze haje 't good veur mekaar! Hae haaj de taofel aafgeruumdj en paktje zien voetbaltas. Wie d'r wèg waas zat zie 't aafwasmesjen aan. Det ging neet gans volges plan, dus effe later ging oppe Hoeëgstraot de telefoon: "Pap, 't water kumtj ane veurkantj d'r oet! Det is toch neet normaal?" "Den mós se ins kieke of de filter tegooj zitj" waas 't antjwoord. "Woeë zitj dae?" Mèt die reactie van Carolien wist Har genógt: "Wacht mer, ich kóm d'r zoeë aan." Effe later haaj Har 't euvel al te gevónje en vèsdje hae ein half pan spaghetti oet 't aafwasmesjen. "Jaomer maedje, des se thoes noeëts de kans kreegst óm aaf te ruume. Martijn kroop dich zeker altied veur."

Dae get bewaartj...

Mariëlle waas heur slipje kwiet van 'n lingersetj. Ze haaj lang gezóchtj, 'ne kieër gevlooktj en zich d'r mer bie nieërgelagtj det ze det noeëts mieër trök zoj zeen. Wie de vastelaovestied aanbroek hooldje Mariëlle heur pekske vanne zólder. Aan 'n stökske klittebandj van heur jeske bungeldje de verlore óngerbóks.



Ich, Jeugdprins Sander, aodste zoon van
John en Sandra Koks-Muijsers, bèn 11 jaor aod
En woeën same mèt mien jónger breurke Lars oppe
Jasmijnstraot
Voetballe doon ich 't leefst van al, bie RKESV D1
Dao bèn ich verdediger, mèt aaf en toe ein blauw plek op
mien bein

Ouch is gamen ein hobby van mich, jao det meuktj mich bliej
Allein of same mèt anger, op de tablet of de Wii
Nao dance muziek loestere doon ich ouch hieël gaer
En gaon edere maondj in Rooj nao de mega dance haer

Ich bèn 2 daag nao de vastelaovendj gebore, op
Valentijnsdaag
Dus de leefdje veur dit fieëst, is t'r al sinds ich in de weeg laag
Aan de jeugd-vastelaovendj doon ich al mèt vanaaf groep 3
En det hób ich dus al aardig ónger de knie

Verder wille wae uch 't volgendje laote wete:

- Wae gaon dit jaor as jeugdprinsepaar veurop en zètte
mèt ós adjudante, Bart en Demi, de Èller Jeugd
vastelaovendj oppe kop
- Ouch de Jeugdraod duit mèt want die haoje waal van fieëste,
dus det weurdjt dit jaor weer LOL en flink tampieëste
- Wae hope det meister Chris en René ós zulle vergaewe,
det wae aaf en toe ein bietje duf zeen van ós drökke prinseleave
- Wae vinje 't te gek det wae nao de bóntje aovendj moge gaon, Woeë ich dit jaor
as jaorige jeugdprins zal staon
- Wae zulle zörge veur ein sjoëen kleurplaat mèt 't Chipsbal, dus det weurdjt weer
fieëst en gezellig veural
- Wae zulle dit jaor zelf oppe prinsewage staon en hope mèt veul kinjer,
muziek en plezeer door de Èller straote te kinne gaon
- Stripbeuk laeze wae allebei gaer, daoróm gaon we 'in de Orde van 't
Stripbeukske' door de Vastelaovendj haer
- Dit alles ónger ós motto:

Same mèt alle stripheldje en heldinne, springe wae de Vastelaovendj binne!

Ich, Jeugdprinses Dionne, dochter van Ard en Angelique
van Roij, bèn 12 jaor geleje as Rogstaeker gebore,
En toen zoeë snel meugelik (al nao eine daag) Moeëreboek
gewore!
Zinge & gitaar speule doon ich 't leefst van al,
Ouch doon ich aan sport: danse & volleybal!

Ich bèn One Direction fan, jao det vinj ich sjiek
Mer vanaaf noe is t'r nog mer Ein Richting: Vastelaoves
muziek
Mien vastelaoves geveul begóst 11 jaor geleje, ich waas toen
bie prins Huub kindj aan hoes
En waas zien mascotte as kleine Moes

Aan de optocht mèt doon of Vastelaoves leedjes zinge
Oet de bol gaon, hosse en springe
same mèt mien klas of pap en mam, geit det allemaol vanzelf
Ouch mien opa en oma doon mèt, want die zitte bie de Rv11



Kwasie Nonsjelantj - Ós Limburgs Geveul

't geit alweer beginne, 't sjoëenste fieëst van 't jaor.
Mien pekske kumtj net binne, ich hang 't alvast klaor.
Confetti mèt vól kleure, jaorliks ein succes.
Ich num 't vastelaovendj, ich num 't Limburgse les!

Refrein:

Dit is 't allersjoeënste fieësje, dit is ós Limburgs geveul.
Wae loupe polonaises van de Maos tot aan de Geul.
Dit is 't allersjoeënste fieësje, dit is de Limbocultuur.
Wae vere vastelaovendj, en gans Limburg geit ós veur.

De optocht geit weer trékke, ich hang mien jeske óm.
'T is kaod óm te verrékke, stil... ich huuer de dikke tróm
De prins dao op dae tore, zien oetzicht det is top.
Ich veul mich as herbore, veer vastelaovendj non stop

Refrein

Winnendj leedje

Tekst & muziek : Steef Maessen
Arrangement: Fer Koolen, Studio Linje

Den is 't dinsdigaovendj, geit de modus op normaal.
Wèg mèt de confetti, 't is gedaon mèt 't kabaal.
De prins duit nog 'n weurdje, .. ein träönke oppe wang
Volgendj jaor weer vere, .. zeetj dus mer neet bang

Refrein

Dit haoje wae lang vol, vastelaovendj is Limburgse Lol

La la la laa la la la la, la la la laa la la la
La la la la la la la la la la la la la la
Dit is 't allersjoeënste fieësje, dit is de Limbocultuur.
Wae vere vastelaovendj, en gans Limburg geit ós veur.
Wae vere vastelaovendj, en gans Limburg geit ós veur.

De Kwakel

Weurdje vanne redactie

Waat zeen d'r in Èll mer weinig minse die stom streek oethole. En den zeen 't ouch nog dek dezelfde. Wae hope det t'r volgendj jaor mieër ezels zeen. Det hoeft neet altied spectaculair te zeen. Mer as Ine van Duuer en heure Maan get gekst oethole, laotj 't ós wete! Of as Koos van Nies zich oppe doem heet gehouwdj mèt tummere, laotj 't ós wete misjien kinne wae dao get van make. Det hóbbe wae dit jaor ouch weer mèt plezeer gedaon. Mischien is neet alles zoeë wie 't heet gegange, mer wae dinke det 't waal zoeë haaj kónne gaon. Wae wore d'r neet altied zelf bie en hóbbe veul van huuere zegge.

Paul van Miet, Nicol Orbon,
Bram Camp (van Thei van Toon van Aere Drees),
Rianne Goldenbeld,
Jos van Lemme en Jeanny vanne Kaolder.



Garage Heemels Peter vd Eertwegh Nicole Moors fruitbedrijf
Bakkerij Koolen Linders kwekerij Wim Steuten
Landgoed Lemmenhof Schildersbedrijf Smeets Steyvers
Hair & Nails 4U Bep van Oosterhout Scissors & Co
Maatschap Breukers TnT Audio, Licht en Karaokeverhuur
UGV Henderikx Eva Strous Logopedie Eetcafé De Prairie
Winkelmolen timmerwerken CUE-Support
Spar Derksen HC Webservices
Jan Custers Taaladvies Slagerij Heijkers



CV de Moerebuuk
Januari 2014, Jaorgank 49

Vastelaovendj 2014
www.moerebuuk.nl

De Kwakel is ein oetgave
van 't Kwakelcomité